

ՊՏՂԱՏՈՒ ՏԵՍԱԿՆԵՐԻ ԵՎ ՆՐԱՆՑ ԿԵՆՍԱՐԱՆՈՒԹՅԱՆ ՀԱՐՑԵՐԸ
V—XIX ԴԱՐԵՐԻ ՀԱՅ ԳՐԱԿԱՆՈՒԹՅԱՆ ՄԵՋ

Հայաստանի տերիտորիայում պտղատու բույսեր մշակվում են շատ վաղուց: Երկրի էնեոլիթյան բնակավայրերում կատարված պեղումներից հայտնաբերվել են խաղողի, ծիրանի, դեղձի, կեռասի կորիզներ, որոնք ունեն շուրջ 6000 տարվա հնություն: Հայաստանի երբեմնի դարգացած պտղաբուծության գոյությունը հաստատվում է նաև հայ և օտարազգի մի շարք հեղինակների վերակայություններով: Այդ մասին արժեքավոր տվյալներ կան անտիկ շրջանի հույն պատմիչներ՝ Հերոդոտի, Քսենոֆոնի, Ստրաբոնի, հայ մատենագիրներ՝ Ագաթանգեղոսի, Մովսես Խորենացու, Փավստոս Բյուզանդի, Անանիա Շիրակացու և այլոց աշխատություններում: Դեռևս վաղ միջնադարից (V—VII դարեր) Հայաստանը հռչակված է եղել իր ընդարձակ այգեստաններով, գինեվետ գավառներով, անուշահամ գինով, բարձրարժեք խաղողով, ծիրանով, դեղձով: Անցյալում պտղաբուծությունը դարգացած էր պատմական Արարատ, Տարոն, Վասպուրական, Սյունիք, Բարձր Հայք, Պարսկահայք, Ծոփք և այլ նահանգներում: Ընդարձակ այգիներով էին շրջապատված երկրի հնագույն քաղաքները՝ Տիգրանակերտը, Զարեհավանը, Արտաշատը, Դվինը, Վաղարշապատը, Երվանդաշատը, Արմավիրը, Վանը, Երեւանը: Այդ բնակավայրերում մշակվում էին մի շարք պտղատու տեսակներ իրենց տասնյակ սորտերով: Ընդհանուր առմամբ հայ հին գրականության մեջ պտղատու տեսակների նկարագրությունների ու նրանց կենսաբանության վերաբերյալ եղած նյութերի հանդիպում ենք պատմական բնույթի աշխատություններում, առակներում, բանաստեղծություններում, կրոնի, փիլիսոփայության, բժշկական և այլ կարգի գրվածքներում:

Հայաստանում տարածված պտղատու տեսակների մասին առաջինը հիշատակել է V դարի պատմիչ Ագաթանգեղոսը «Պատմություն հայոց» աշխատության մեջ: Պտղատու տեսակներից այստեղ նշվում են դեղձենին, խնձորենին, տանձենին, սերկեիլենին, հոնը, ընկուղենին, նշենին, նոնենին, թզենին, թթենին:

V դարի հայ հեղինակների գրվածքներից հետաքրքիր է նաև Մովսես Խորենացուն վերագրվող «Յաղագս պիտոյից» կոչվող աշխատությունը: Այստեղ, հայ գրականության մեջ առաջին անգամ, համառոտակի նկարագրվում են ձիթենին, արմավենին, խաղողի վաղը, տրվում է նրանց օգտակարության և վնասակարության հարցերի բնութագիրը: Այսպես, օրինակ, «Պիտոյից» գրքում ձիթենին ներբողված է բոլոր տեսակի ծառերից «պատվականագույնն ու փարթառմն, իր առավելյալ աղնվականությամբ»: Գովելի է նաև արմավենին, որն ունի «յարադուարձ պայծառութիւն և քաղցրաճաշակ պտուղ» բայց իր նշա-

նակությամբ չի կարող հավասարվել ձիթենուն, որովհետև նա «զանչոյս աղ-
ջամուղջ գիշերոյն գրեթէ անստուեր միջորեայ գործի... և խառնի բժշկացն
առողջական սպեղանիս բազում անգամ զախտաժեղություն փարատելով»։ Հա-
կառակ դրանց, գրքում խիստ պարսավանքի է ենթարկվում խաղողի վաղը,
որովհետև արտաքինից իր համով ու գույնով գրավիչ է, բայց ներսից ունի
դառն շարություն։ Այս շարությունը, ըստ երևույթին, նրա համար է, որ նա
գինու աղբյուր է հանդիսանում, իսկ գինին էլ — բազմաթիվ չարիքների [10]։

Պտղատու բույսերի վերաբերյալ հետաքրքիր տեղեկություններ կան VII
դարի հայտնի գիտնական Անանիա Շիրակացու «Աշխարհացոյցում»։ Այստեղ
հիշատակվում է ոչ միայն պտղատու մի շարք տեսակների անուններ, այլև
նշվում է նրանց մշակության վայրը։ Այսպես, օրինակ, շագանակ մշակվում է
Տարոնի նահանգում՝ Արածանիի հովտում, ձիթենի՝ Ուտիք նահանգում, նշենի՝
Տայքում, նոնենի՝ Սյունիքում (Արևիք գավառում), պիստակենի՝ Հայկական
Տավրոսի Արեգունի փեշերին, սերկեխիենի՝ Տայքում և Գուգարքում, խաղող՝
Վասպուրականում, Գողթն գավառում։

Ժամանակագրական կարգով հաջորդ հեղինակը, որ անդրադարձել է մեզ
հետաքրքրող թեմային, X դարի բանաստեղծ Գրիգոր Նարեկացին է։ Եթե մինչ
այդ հայ հեղինակները պտղատու բույսերի մասին խոսել են իրենց պատմու-
թյուններում և արձակ ստեղծագործություններում, ապա Նարեկացու մոտ այդ
թեման առաջին անգամ հանդես է գալիս բանաստեղծության մեջ։

Նարեկացու «Գոհար վարդն վառ առեալ» գրվածքի հինգերորդ տողում
կարդում ենք.

«Քրքում վակասիր պտուղն սնաներ խուռն տերևով»։

Ուրեմն հայ բանաստեղծին դեռևս X դարում հայտնի է եղել տերևի սախ-
միլյացիոն դերը։ Մի բան, որը մինչև XIX դարի վերջերը չէր ընդունվում։ Այդ
մասին ուսմեծ գիտնական Կ. Ա. Տիմիրյազևը [9] ասում է. «Դարերի ընթաց-
քում մարդը համառորեն հրաժարվում էր ընդունել տերևի անմիջական օգ-
տակարությունը... տերևը շարունակում էր համարվել շքեղ, բայց անօգուտ
ղզեստի թեթևամիտ փառքը։ Այնինչ, տերևն արմատի նման՝ անհրաժեշտ է
բույսի սննդառության գործում»։

Ա. Շ. Մնացականյանը [8], անդրադառնալով Գր. Նարեկացու այդ նույն
մտքին, գրում է. «Տվյալ հարցի արծարծումը բանաստեղծի մոտ պատահա-
կանություն չէ։ Այս գրված է մի այնպիսի հոշակավոր անձնավորության կող-
մից, որը հավասարապես վայելել է թե՛ խոշոր բանաստեղծի, թե՛ մեծ գիտ-
նականի և թե՛ հոշակավոր ուսուցչի փառքը»։ Նարեկացուն, որպես բնությունը
սիրող բանաստեղծի, անշուշտ հետաքրքրել է առօրյա աշխարհը։ Եվ ահա նա
նկատում է, որ զանազան պատճառներից տերևազրկված ծառի մոտ պտուղ-
ները լինում են թերզարգացած, դժգույն ու անհամ։ Ելնելով դրանից, հեղի-
նակը եզրակացնում է, որ տերևը ինչ-որ ձևով պտուղներին սնունդ է մատա-
կարարում։ Հենց դրանով էլ նա հանգում է մի այնպիսի ճշմարտության, որն
իր գիտական ձևակերպումն ստացավ նրանից 900 տարի հետո։

Պտղատու բույսերի կենսաբանական առանձնահատկությունների վերա-
բերյալ որոշ տվյալներ կան նաև XIV դարի գիտնական Գրիգոր Տաթևացու
«Հարցմանց գրքում»։ Սա, ինչպես անունը ցույց է տալիս, հարց ու պատաս-
խանի ձևով գրված սովորածավալ աշխատություն է, որի նյութերի մի մասը
հեղինակը հավաքել է ժամանակի գրականության տվյալներից, իսկ մյուսը՝

գրել է ինքրի «Հարցմանց գրքում» պատգամու տեսականներին վերաբերվող նյութերը տրված են IV հատորի «Յաղագս բուսոց և տնկոց» վերնագրի տակ։ Այստեղ Տաթևացին հարցնում է, թե ինչո՞ւ սկզբում ծառի ծաղիկն է երևում, իսկ հետո՝ պտուղը, և տալիս է հետևյալ պատասխանը։ «Նախաշաւից է ծաղիկն պտղոյն, որպես ի մեզ նախ զգայնականն երևի, ապա բնականն»։ Հետո, վկայակոչելով իրեն հայտնի շորս տարրերին, ավելացնում է. Մաղիկն առաջանում է ջերմությունից, որ նախ շարժվում է, հետո երևում։ Եվ պտուղն ջրից... տերևն օդից, իսկ ծառի փայտանյութը՝ հողից։ Շարունակելով հարցերը հեղինակը իր առաջ խնդիր է դնում պարզելու, թե որտեղից են առաջանում պտուղների գույներ, հոտը, համը ու պատասխանում է. «արեգակից... խնձորը մեզ օրինակ,—ասում է նա,— Զի ի շորս տարրէ է փոյացել»։ Այն աճել է հողում, սնվել ջրով, օդից համ ստացել և արեւից՝ գույն։ Տաթևացին ավելի ուշագրավ խնդիր է առաջ քաշում, թե ինչո՞ւ սերմերն ամռանն ու ձմռանը չեն ծլում. և պատասխանում է, որ ամառը շատ շոգ է, դրա համար չորանում է, իսկ ձմեռը խիստ ցուրտ է՝ սառեցնում է։ Բայց դարձան ու աշնանը ջերմությունը և խոնավությունը բավարար են, դրա համար էլ սերմերը ծլում են։ Չորությունը ու ցրտությունը խանգարում են բուսական օրգանիզմի առաջացմանը, իսկ ջերմությունը և խոնավությունը՝ օգնում։ Այստեղ ուշագրավ է այն, որ հեղինակը շոշափում է լուսային ռեժիմի խնդիրը։ Ահա հիմնականում սրանք են Գրիգոր Տաթևացու կողմից արժարժված հարցերը, որոնց պատասխանները տրվում են իդեալիստորեն։

Հետագայում նման մտքեր արտահայտում է նա XV դարի հեղինակ Հովհաննես Երզնկացին։ Ըստ նրա պատկերացման, բացի ջրից խաղողի, խնձորի, վարդի և այլ բույսերի բազմապիսի գույները, նրանց ծաղիկների հոտը, պտուղների համը հողի, ջերմության և սննդառության ազդեցության արդյունք են։ Ավելին, Երզնկացու կարծիքով ոչ թե աստված, այլ բնությունն է ստեղծել գոյություն ունեցող բոլոր տեսականները։ Ինչպես տեսնում ենք, դեռևս XV դարի հայ հեղինակը մերժում է արարչագործության գաղափարը, կենդանիների ու բույսերի ծագման խնդիրը կապում բնության հետ, առաջ քաշում ուշագրավ տեսակետներ և դրանով բարձրանում իր դարից, դասվում ժամանակի առաջավոր մտածողների շարքը։

Ուսումնասիրվող թեման յուրահատուկ ձևով է արտահայտվում հայ բժշկագետների աշխատություններում։ Այդ տեսակետից առանձնապես ուշագրավ են միջնադարյան հայտնի գիտնական-բժշկագետներ Մխիթար Հերացու (XII դար) և Ամիրգովլաթ Ամասիացու (XV դար) աշխատությունները։

Մխիթար Հերացին 1184 թվականին գրել է բժշկագիտական մի աշխատություն, որը հայտնի է «Զերմանց Մխիթարություն» անունով։ Այստեղ հեղինակը խոսում է սերկևիլի, նռան, ձիթապտղի, փշատի, ունաբի բուժիչ նշանակության մասին և տալիս այն ժամանակ հայտնի մի քանի սորտերի անուններ։ Այսպես, օրինակ, սերկևիլնուց հիշատակվում են քաղցր, կիսաքաղցր, թթու, իսկ նոնենուց՝ քաղցր և թթու սորտերը։ Անհրաժեշտ ենք համարում նշելու, որ հիշյալ տեսակների մոտ մինչև այժմ էլ այդ նույն սորտերը պաշտպանվել են և լայն տարածում ստացել։ Այս համեմատանքը կարող է որոշ նշանակություն ունենալ սերկևիլնու և նոնենու սորտերի պատմությունը ուսումնասիրելու համար։

Պտղատու տեսակների և նրանց սորտերի մասին Ամիրզուլաթ Ամասիացին խոսում է իր «Անգիտաց անպետ» աշխատության մեջ: Ստորև բերվում են այդ գրքից մի քանի օրինակներ.

Ծիրանենի: Մշակության մեջ հայտնի են ծիրանենու շատ սորտեր¹: Լավն այն է, որ խոշոր, քաղցր և դեղին լինի: Թարմ ծիրանը օգտագործելիս հովացնում է ստամոքսը և ծարավը կտրում: Ծիրանենին շատ երկրներում է տարածված, բայց «Եւ լաւն եւ աղեկն ի հայոց երկրին լինի»:

Դեղձենի: Դեղձենիների մեջ լավն այն է, որ իր կորիզից շուտ է բաժանվում: Սրա պտուղները կազդուրում են սիրտը, խաղաղեցնում ստամոքսի ջերմությունը, կտրում ծարավը: Տերևներն օգտագործվում են որպես ճիճվահան միջոց, իսկ ծաղիկները՝ լուծողական:

Խնձորենի: Բժշկության մեջ խնձորենու պտուղները օգտագործվել են շատ վաղուց: Հայերի մոտ սովորություն է եղել հիվանդատես գնալու ժամանակ խնձոր տանելը: Ընդհանրապես քաղցր սորտերի պտուղները ուժովացնում են սիրտը, օգնում ստամոքսին, փորացավին, իսկ թթուն գործադրվում է ջերմության, թունավորվելու և կարճահարի դեմ: Եթե եփած խնձորը ծեծեն ու դնեն աչքին լավացնում է տեսողությունը և ցավը կտրում: Տերևների քամուկն էլ օգնում է նոր առաջացած տաք ուռուցքներին:

Տանձենի: Մշակության մեջ հայտնի են տանձենու շատ սորտեր: «Լավն Շահ արմուտը և Սինին է»: Սրանց պտուղները խոշոր են, քաղցր, հյութալի, զովացնող: Տանձը կապում է փորը, օգնում թորախտի բուժվելուն, ուժեղացնում սիրտը և ստամոքսը: Սերմերը ճիճվահան միջոց են: Տանձը պետք է ուտել անպայման ճաշից հետո:

Սալորենի: Հայտնի են սալորենու սպիտակ, դեղին և սև գույնի պտուղներով սորտերը: Լավն այն է, որ խոշոր լինի և քաղցր: Սալորենու պտուղները օգտագործելու դեպքում օգնում են երիկամներում եղած քարին, իջեցնում օրգանիզմի ջերմությունը, բայց ստամոքսը թուլացնում է, փայծախը վնասում:

Ամիրզուլաթ Ամասիացու «Անգիտաց անպետ» աշխատությունը արժեքավոր է ոչ միայն պտղատու տեսակների ունեցած բուժիչ նշանակության, այլև պտուղների սորոտագիտության պատմության տեսակետից: Այդ առումով ուշագրավ է այն, որ դեռևս XV դարում ականարկվում են դեղձենու ճղովի ու լոժ, ծիրանենու դեղնամիս և սպիտակամիս, սալորենու սպիտակ, դեղին ու սև, նոնենու թթու և քաղցր սորտերը: Ամիրզուլաթը հիշատակում է նույնիսկ տանձենու Սինի սորտը, որը անվիճելիորեն հաստատում է նրա տեղական ծագումը:

Մեզ հետաքրքրող թեմայի վերաբերյալ արժեքավոր տվյալներ կան XVII դարի մատենագիր Հակոբ Կարնեցու «Տեղագիր վերին հայոց» խորագիրը կրող աշխատության մեջ: Կարնեցու ապրած ժամանակաշրջանում Բարձր Հայք (էրզրումի) նահանգը ունեցել է 23 գավառ: Այդտեղ այգեգործությունը զարգացած էր Ալաշկերտ, Դարանաղյաց, Դերջան, Եկեղյաց, Իշխանաձոր, Խորձունյաց գավառներում: «Ձորն իշխանանիստ ունի բազում այգիք, բուրաստանք, պտուղ ծառոց և գինի քաղցրահամ», — գրում է հեղինակը: Այստեղ «Լինի տանձ և առաւել խնձոր դարմանալի հոտով և համով... որ մեկն անշափ մեծ է, որ ԲՃ

¹ Թնայրում ասված է ցեղ, որը այժմյան հասկացողությամբ պետք է բնորոշել տվյալ տեսակին պատկանող սորտը:

(200) գրամ կշռէ. գունն կարմիր կամ սպիտակ յոյժ, որ հանապազ Ստանպօլ և դրունս մեծամեծ ընծայ մատուցեալ լինի, որ անվամբ Շահալմասի ասեն»։ Այնուհետև շարունակում է. այստեղ լինում են խաղող, ծիրան, ընկույզ, նուշ, կաղիւն, նուռ, ձիթապտուղ, արմավ, փշատ, շամիչ, որոնցով ամբողջ տարին շուկաները լիքն են։

Ինչպես տեսնում ենք, Հակոբ Կարնեցու աշխատության մեջ նկարագրւմբ է խնձորենու Շահալմասի սորտը։ Խոսվում է հիշյալ սորտի պտուղների մեծության, կշռի, գույնի, համի և հոտի մասին։ Սա պտղատու բույսերի սորտերի ուսումնասիրության տեսակետից բավական արժեքավոր է և մի քայլ ավելի առաջ է նախորդ հեղինակների նկարագրություններից։

Վերջապես հաջորդ ուշագրավ աղբյուրը գյուղատնտես Ա. Աթանասյանի «Երևանի նահանգի բուսականությունը» գիրքն է. որը հրատարակվել է 1880 թվականին։ Այստեղ գյուղատնտեսական մի շարք բույսերի հետ միասին որոշ տեղ է հատկացվում նաև պտղատու տեսակներին։ Ճիշտ է գրքում պտղատու կորիզավոր, հնդավոր, ընկույզավոր տեսակները դասավորված են խառը և միևնույն տեսակի կազմում սորտերի նկարագրությունները տրված են շատ համառոտ, բայց այն իր տեսակի մեջ բավական հետաքրքիր է։ Այդ հետաքրքրությունը նախ կայանում է նրանում, որ գրքում հեղինակը առաջին անգամ հայերեն լեզվով նկարագրում է պտղատու 14 տեսակների մոտ 40 սորտեր։ Երկրորդ՝ որ պտղատու բույսերի սորտագիտությամբ զբաղվող գիտական աշխատողները այդ գիրքը կարող են օգտագործել որպես սկզբնաղբյուր։ Ստորեքերում ենք Ա. Աթանասյանի հիշատակած տեսակների և նրանց սորտերի նրկարագրությունների մի քանի օրինակներ։ «Ծառերը Երևանի նահանգում բաժանվում են երկու դասակարգի,— գրում է նա,— պտղատու և անպտղատու։ Պտղատու ծառերի մեջ առաջին տեղը կարող է բռնել ծիրանենին։ Ծիրանենին բավական դիմացկուն լինելով, կարող է սպրեյ հիսունից մինչև ութսուն տարի։ Նա սիրում է կրախառն հող, խմում քիչ ջուր, աճում բավականին ուժեղ և արձակում շատ ճյուղեր։ Փայտը բավականին կարծր լինելով, տալիս է լավ ածուխ։ Ծիրանը ունի շատ սորտեր։ Դրանք են Սպիտակ ծիրանը, Աղջանաբաթը, Գեոգջանաբաթը, Բադամարիկը, Գյառզյառը, Նովրաստը»։

Ա. Աթանասյանի գրքում դեղձենիներից հիշատակվում են Կլոր նարնջին, Զվաձե նարնջին, Սպիտակ լոձը, Կարմիր լոձը, Ճղովին։ Տանձենիներից՝ Մալաշան, Սինին, Զմեռնուկը և մի շարք տեսակների բազմաթիվ սորտեր։

Ահա հիմնականում սրանք են V—XIX դարերի հայ գրականության տվյալները պտղատու տեսակների և նրանց կենսաբանական առանձնահատկությունների վերաբերյալ։ Եթե մի անգամ ևս աչքի անցկացնենք այդ բոլորը, ապա կտեսնենք, որ V—X դարի հեղինակները նշել են միայն Հայաստանում մշակվող պտղատու տեսակները։ Մինչդեռ XV—XVI դարերի գրողները հիշատակում են արդեն իրենց ժամանակաշրջանում տարածված սորտերը։ Վերջապես XVII դարից հետո հանդիպում ենք պոմոլոգիական որոշ նկարագրությունների, որը բավական մոտ է ժամանակակից մասնագիտական գրականության սկզբունքներին։

Э. С. МОРИКЯН

ПОРОДЫ ПЛОДОВЫХ КУЛЬТУР И ВОПРОСЫ ИХ БИОЛОГИИ В АРМЯНСКОЙ ЛИТЕРАТУРЕ V—XIX ВЕКОВ

Р е з ю м е

Плодовые растения в Армении культивируются с давних времен. При археологических раскопках выявлены семена винограда, абрикоса, персика, черешни, которые имеют 6000-летнюю давность и относятся к энеолиту.

Ряд армянских авторов подтверждает развитое плодоводство в прошлом. Первое упоминание об этом относится к V веку. В частности, в «Истории Армении» Агатангелоса, из плодовых культур приводятся персик, яблоня, груша, айва, кизил, грецкий орех, миндаль, гранат, инжир, шелковица. У Мовсеса Хоренаци (V век), Амирдовлата Амасиаци (XV век), Акопа Карнеци (XVII век) и других имеются краткие описания плодовых культур и их сортов.

Армянскому поэту Григору Нарекаци в X веке уже были известны вопросы ассимиляции листьев у плодовых деревьев, а ученые Григор Татеваци (XIV век) и Оганес Ерзнкаци (XV век) знали о важности воздуха, почвы, воды, температуры, света и питания для деревьев.

Авторы V—X веков отмечали в основном породы. Между тем авторы XI—XVII веков упоминают и сорта абрикоса, персика, айвы, яблони, груши, распространенные в стране.

Գ Ր Ա Վ Ա Ն Ո Ւ Թ Յ Ո Ւ Ն

1. Ազարանգեղոս Պատմութիւն Հայոց, Թիֆլիս, 1914, էջ 324;
2. Անանիա Շիրակացի Աշխարհացոյց, Երևան, 1944;
3. Ամիրդովլար Ամասիացի Անդիտաց անպետ, Վիեննա, 1926;
4. Գրիգոր Նարեկացի Տաղեր, Երևան, էջ 50, 1957;
5. Գրիգոր Տառնացի Գիրք Հարցմանց, Կ. Պոլիս, էջ 212, 1729;
6. Հակոբ Կարենցի Տեղագիր Վերին Հայոց, Վաղարշապատ, էջ 12, 18, 1903;
7. Մովսես Խորենացի Մատենագրութիւն, գիրք Բ, Վենետիկ, էջ 464, 1865;
8. Մնացականյան Ա. Շ. Բուսաբանական մի կարևոր տեղեկություն Գ. Նարեկացու մոտ, ՀՍՍՀ ԳԱ րնական գիտությունների «տեղեկագիր», 9, էջ 91, 1946;
9. Տիմիրյազև Կ. Ա. Բույսի կյանքը, Երևան, 1948;
10. Տեր-Պողոսյան Ավ. Բիոլոգիական մտքի զարգացումը Հայաստանում, Երևան, էջ 36, 68, 1960;